

**Broj: 07-02-1334-04/40/11**  
**Mostar, 13.01.2012. godine**

Na osnovu člana 14. i člana 15. Zakona o električnoj energiji („Službene novine Federacije BiH“ broj 41/02, 24/05, 38/05 i 83/11), člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), člana 31. stav (2), člana 52. i člana 53. Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), te člana 44. stav (1) tačka a), člana 45. i člana 50. stavovi (1) i (3) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 37/05) i člana 9., člana 52., člana 53., člana 55. i člana 59. stav (1) Pravilnika za tarifnu metodologiju i tarifne postupke („Službene novine Federacije BiH“ broj 45/05 i 77/10), Regulatorna komisija za električnu energiju u Federaciji Bosne i Hercegovine – FERK je, na I redovnoj sjednici održanoj u Mostaru dana 13.01.2012. godine, donijela sljedeću

## **O D L U K U**

### **o provođenju petog tarifnog postupka**

#### **Član 1.**

Utvrđuje se da je započeo peti tarifni postupak po zahtjevu podnesenom od strane Javnog poduzeća „Elektroprivreda Hrvatske zajednice Herceg Bosne“ dioničko društvo Mostar za pokretanje tarifnog postupka za djelatnost snabdijevanja električnom energijom prvog reda, primljenog u FERK 30.12.2011. godine pod brojem 07-02-1334/40/11.

#### **Član 2.**

Ovom odlukom utvrđuje se da je započeo postupak formalne rasprave u petom tarifnom postupku po zahtjevu iz člana 1. ove odluke, na kojoj će se raspravljati i o prijedlogu tarifnih stavova za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar.

#### **Član 3.**

FERK planira postupak formalne rasprave provesti najkasnije do 29.02.2012. godine prema planu aktivnosti na provođenju postupka formalne rasprave iz člana 4. ove odluke, vodeći računa o rokovima za donošenje konačnih odluka o određivanju tarifa u petom tarifnom postupku.

#### **Član 4.**

- (1) Formalna rasprava u petom tarifnom postupku pokrenutom po zahtjevu iz člana 1. ove odluke, a na kojoj će se raspravljati i o prijedlogu tarifnih stavova za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar planira se održati 31.01.2012. i 01.02.2012. godine sa početkom u 09:00 sati, u prostorijama FERK-a, na adresi Blajburških žrtava broj 33, Mostar.
- (2) Prije održavanja formalne rasprave iz stava (1) ovog člana, održat će se pripremna rasprava radi odlučivanja o rasporedu radnji i drugim proceduralnim pitanjima kojima se upravlja tokom postupka.

#### Član 5.

- (1) Formalna rasprava se održava u cilju utvrđivanja bitnih činjenica da bi FERK riješio o zahtjevu iz člana 1. ove odluke, kao i o prijedlogu tarifnih stavova za nekvalifikovane (tarifne) kupce Javnog poduzeća „Elektroprivreda Hrvatske zajednice Herceg Bosne“ dioničko društvo Mostar.
- (2) Na formalnoj raspravi će se provesti dokazni postupak za utvrđivanje činjenica, koji obuhvata uvid u isprave i druge dokumente, izjave strana u postupku, izjave svjedoka, a po potrebi mogu se izvoditi i drugi dokazi.

#### Član 6.

Formalna rasprava iz člana 4. ove odluke je otvorena za javnost, ali u istoj mogu učestvovati zaposlenici FERK-a, podnosilac zahtjeva i umješaci.

#### Član 7.

- (1) Obavještenje za javnost o podnesenom zahtjevu iz člana 1. ove odluke i mjestu i vremenu održavanja formalne rasprave iz člana 4. ove odluke objavit će se u „Dnevnom listu“ i „Oslobođenju“ na dan 14.01.2012. godine, „Večernjem listu“ na dan 16.01.2012. godine i na web stranici FERK-a, na dan 13.01.2012. godine, te će isto sadržavati informaciju da na formalnoj raspravi mogu učestvovati zaposlenici FERK-a, podnosilac zahtjeva i umješaci.
- (2) U obavještenju se navodi da umješac Zahtjev za sticanje statusa umješaca u postupku formalne rasprave, po Zahtjevu za pokretanje tarifnog postupka za djelatnost snabdijevanja električnom energijom prvog reda primljen u FERK pod brojem 07-02-1334/40/11, a na kojoj će se raspravljati i o prijedlogu tarifnih stavova za nekvalifikovane (tarifne) kupce, podnosi do 19.01.2012. godine do 12:00 sati, koji je i rok do kada zainteresovana lica mogu dostaviti svoje pisane komentare.
- (3) Obavještenje iz stava (1) ovog člana je sastavni dio ove odluke.

#### Član 8.

Status umješaca u formalnoj raspravi može steći pravno ili fizičko lice pod uslovom da pravovremeno podnese zahtjev za sticanje statusa umješaca i da ispunjava sljedeće kriterije:

- a) da ima direktan interes u postupku rješavanja zahtjeva iz člana 1. ove odluke i/ili po prijedlogu tarifnih stavova za nekvalifikovane (tarifne) kupce, u vezi kojeg podnosi zahtjev za sticanje statusa umješaca, a koji je različit od opšteg javnog interesa,
- b) da raspolaže podacima i činjenicama od značaja za formalnu raspravu u petom tarifnom postupku koji se vodi pred FERK-om, a na kojoj će se raspravljati i o prijedlogu tarifnih stavova za nekvalifikovane (tarifne) kupce.

#### Član 9.

Ova odluka stupa na snagu danom donošenja, te se objavljuje na web stranici i oglasnoj tabli FERK-a, kao i u „Službenim novinama Federacije BiH“.

## Образложење

Članom 52. Pravilnika za tarifnu metodologiju i tarifne postupke propisano je da se tarifni postupak pokreće podnošenjem zahtjeva FERK-u od regulisanog elektroprivrednog društva ili na inicijativu FERK-a, kao i koji se sve dokazi i dokumentacija dostavljaju uz zahtjev, dok je članom 53. ovog pravilnika propisano da zahtjev i prilozi uz zahtjev za pokretanje tarifnog postupka moraju biti izrađeni u skladu sa Pravilnikom o izvještavanju. Članom 55. Pravilnika za tarifnu metodologiju i tarifne postupke propisano je da FERK vodi tarifni postupak i odlučuje na način utvrđen ovim pravilnikom, Poslovnikom o radu i Pravilnikom o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine, dok je članom 59. stavom (1) ovog pravilnika propisano da FERK nakon donošenja rješenja iz člana 58.a. ovog pravilnika posebnom odlukom, na redovnoj sjednici, odobrava i proglašava važećim tarifne stavove za nekvalifikovane (tarifne) kupce i tarifne stavove za korisnike distributivnog sistema. Na osnovu člana 52. stava (1) Pravilnika za tarifnu metodologiju i tarifne postupke, FERK je 30.12.2011. godine pod brojem 07-02-1334/40/11 primio Zahtjev za pokretanje tarifnog postupka za djelatnost snabdjevanja električnom energijom prvog reda podnosioca Javnog poduzeća „Elektroprivreda Hrvatske zajednice Herceg Bosne“ dioničko društvo Mostar

Prilikom pregleda kompletnosti primljenog zahtjeva utvrđeno je da isti ne sadrži sve potrebne podatke i dokumente propisane Pravilnikom za tarifnu metodologiju i tarifne postupke i Pravilnikom o izvještavanju. Na osnovu navedenog, FERK je uputio podnosiocu zahtjeva Obavještenje o nedostacima podnesenog zahtjeva za pokretanje tarifnog postupka za djelatnost snabdjevanja električnom energijom prvog reda 05.01.2012. godine pod brojem 07-02-1334-01/40/11 kojim je tražio od podnosioca zahtjeva da zahtjev dopuni potrebnim podacima i dokumentima, u roku od osam dana od dana prijema tog obavještenja.

Povodom navedenog Obavještenja o nedostacima podnesenog zahtjeva, u FERK u ostavljenom roku od osam dana od prijema istog, dana 11.01.2012. godine pod brojem 07-02-1334-02/40/11 primljen dopis Javnog poduzeća „Elektroprivreda Hrvatske zajednice Herceg Bosne“ dioničko društvo Mostar „Dostava informacija“, te 12.01.2012. godine pod brojem 07-02-1334-03/40/11 dopis „Dostava dodatne dokumentacije i podataka uz Zahtjev za pokretanje tarifnog postupka za djelatnost snabdjevanja električnom energijom I reda i odobrenje troška nabavke“ u kojima podnosilac zahtjeva predlaže potrebne prihode za regulisane djelatnosti na nivou odobrenih FERK-ovim rješenjima: 07-02-1593-73/26/09, 07-02-1593-73/26/09 i 01-07-1311-91/09 od 21.07.2010. godine. Korekcije cijena su zasnovane na zahtijevanom trošku nabavke električne energije od 176.939.216 KM i iste su predložene samo za kupce na 110 kV naponskom nivou, za koji je traženo prosječno povećanje od 33%, te su uz dopise dostavljeni i predloženi tarifni stavovi za nekvalifikovane (tarifne) kupce.

Članom 44. stavom (1) tačka a) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine propisano je da postupak formalne rasprave započinje podnošenjem tarifnog zahtjeva od regulisanog preduzeća, koji je kompletan i u skladu sa zahtjevima FERK-a. Članom 45. istog pravilnika propisana je obaveza obavještanja javnosti o podnesenim zahtjevima i o datumu održavanja formalnih rasprava, kao i sadržaj obavještenja za javnost, dok je članom 50. stavom (1) i stavom (3) ovog pravilnika propisano da nakon početka postupka formalne rasprave FERK zakazuje formalnu raspravu za provođenje dokaza radi utvrđivanja činjenica, te da FERK utvrđuje rok u kojem se formalna rasprava mora održati i donijeti konačna odluka FERK-a.

FERK je kod donošenja ove odluke pošao od ovlaštenja i obaveza Javnog poduzeća „Elektroprivreda Hrvatske zajednice Herceg Bosne“ dioničko društvo Mostar utvrđenih Dozvolom za rad-licencom za obavljanje elektroprivredne djelatnosti snabdjevanja električnom energijom prvog reda, da ugovara nabavku i isporuku električne energije za nekvalifikovane (tarifne) kupce na svom području djelovanja, odnosno od obaveze Javnog poduzeća „Elektroprivreda Hrvatske zajednice Herceg Bosne“ dioničko društvo Mostar da obavlja uredno snabdjevanje električnom

energijom prvog reda za nekvalifikovane (tarifne) kupce kao javnu uslugu. FERK kao regulator, a na osnovu Zakona o električnoj energiji utvrđuje cijene električne energije zasnovane na opravdanim troškovima koje u svom poslovanju ostvaruju regulisana javna elektroprivredna preduzeća, uvažavajući da nabavka, odnosno trošak nabavke nedostajuće količine električne energije, utiče na snabdijevanje nekvalifikovanih (tarifnih) kupaca, odnosno cijenu električne energije za nekvalifikovane (tarifne) kupce. Stoga je neophodno da se nakon nabavki nedostajućih količina električne energije razmotre troškovi snabdjevanja električnom energijom nekvalifikovanih (tarifnih) kupaca Javnog poduzeća „Elektroprivreda Hrvatske zajednice Herceg Bosne“ dioničko društvo Mostar, a posebno troškovi nabavke električne energije za 2012. godinu, radi osiguranja kontinuiranog i sigurnog snabdjevanja električnom energijom, da bi FERK utvrdio prosječnu proizvodno-nabavnu cijenu koja se putem tarifnih elemenata alocira na kategorije i grupe potrošnje, odnosno tarifne stavove za nekvalifikovane (tarifne) kupce. FERK će ovaj tarifni postupak provesti da bi Javno poduzeće „Elektroprivreda Hrvatske zajednice Herceg Bosne“ dioničko društvo Mostar bilo u mogućnosti da obavlja svoju obavezu javne usluge snabdjevanja nekvalifikovanih (tarifnih) kupaca, odnosno u cilju zaštite opšteg javnog interesa, da sigurnost snabdjevanja svih kupaca električnom energijom ni u jednom trenutku ne bi bila upitna.

U skladu sa članom 9. Pravilnika za tarifnu metodologiju i tarifne postupke, FERK će započeti peti tarifni postupak na osnovu podataka koje je dostavio podnosilac zahtjeva, a na dostavljanju sve tražene, a nedostajuće dokumentacije, podataka i informacija, FERK će insistirati tokom tarifnog postupka, te može zahtijevati od podnosioca zahtjeva dostavljanje procjene istih, s tim da FERK zadržava i pravo vlastite procjene istih, a sve u skladu sa Pravilnikom za tarifnu metodologiju i tarifne postupke i Pravilnika o izvještavanju.

Na osnovu navedenog, odlučeno je kao u dispozitivu odluke.

**PREDSJEDNICA FERK-a**  
**Đulizara Hadžimustafić s.r.**